

Morning Regional Dogri News Bulletin, 10 July 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- डोडा जिले च सुरक्षाबलें ते आतंकवादिएं बश्कार टाकरा, कठुआ आतंकी हमले दे बाद जारी तुपाई अभियान दा दायर उधमपुर तोड़ी बधायी गेआ। राश्ट्रीय जांच एजेंसी मामले दी जांच च सहयोग करोग।
- 2- प्रधानमंत्री होर अज्ज वियना च आस्ट्रिया दे चांस्लर कार्ल नेहाम्मर हुंदे नै गल्लबात करंगन।
- 3- अमरनार्थें दी जातरा पूरी रमानदारी ते बवस्था आले ढंगगे सिर जारी। जम्मू थमां 4 जहार 627 श्रद्धालुएं गी लेइए इक होर जत्था अज्ज बड्डलै घाटी लेई रवाना होआ।
- 4 किश्तवाड़ जिले च इक कार दे सड़कें परा रूलकिए ढूंगी खड्डै च जाई पौने कारण 4 जनें दी मौत।

<><><><><><>

NIA-Kathua

डोडा जिले च कल आतंकवादिएं ते सुरक्षाबलें बश्कार छिड़े दा टाकरा अजे चलै करदा ऐ जिसले कि कठुआ जिले दे मछेडी इलाके च संगारें होए दे आतंकी हमले दी जांच च एनआईए सहयोग करोग। इस हमले च 5 सैनिक शहीद होई गए हे ते 5 दुए जख्मीं होई गे हे। पुलस

महानिदेशक आर.आर स्वैन होर कल उत्थे चला रदे तुपाई अभियान दा जायजा लेने लेई आपूं उत्थे पुज्जे। तुपाई अभियान दा दायर हून कन्नै लगदे उधमपुर दे जंगलें तोड़ी बधाई दिता गेदा ऐ। आधिकारिक जानकारी मुजब विशेष बल सर्जिकल कार्रवाई लेई तैनात कीता गेदा ऐ। तोआई डोडा जिले दे गादी गोली आले जंगलें च भागवा लाहके च सुरक्षाबलें लाहके गी घेरिए तुपाई अभियान चलाए दा ऐ। उत्थे त्रै विदेशी आतंकवादिएं दी मजूदगी बारै सूह थहोने पर एह कारवाई कीती जा'रदी ऐ।

<><><><><><>

PM-Modi

दऊं मुखें दे अपने मजूदा दौरै दे दुए चरण तैहत प्रधानमंत्री नरेंद्र मोदी होर आस्ट्रिया दी दऊं दिनें दी जातरा पर कल वियेनना पुज्जी गे। पिच्छले 41एं बरें च भारत दे कुसै प्रधानमंत्री हुंदी एह आस्ट्रिया दी पैहली जातरा ऐ। श्री मोदी होर आस्ट्रिया दे राष्ट्रपति एलेक्जेंडर वान डेर बेलेन हुंदे नै मलाटी करंगन ते आस्ट्रिया दे चांस्लर कार्ल नेहम्मर हुंदे नै अज्ज गल्लबात करंगन। प्रधानमंत्री मोदी ते आस्ट्रिया दे चांस्लर होर दौनें मुखें दे बड्डे कारोबारी लीडरें गी बी संबोधित करडन। श्री मोदी होर वियेना च भारतीय समुदाय दे लोकें कन्नै बी गल्लबात करडन।

<><><><><><>

Amarnath-Yatra

जम्मू दे भगवती नगर आले आधार शिविर थमां 4 जहार 627 श्रद्धालुएं दा इक होर जत्था घाटी लेई रवाना होआ। एह श्रद्धालु 185 गड्डिएं दे काफिले च अगड़ी जातरा लेई रवाना होए। इस जत्थे च 3 जहार 422 मर्द, इक जहार 27 महिलां, 26 बच्चे, 137 साधु, 16 साध्वियां शामिल हियां।

कल 4 जहार 627 श्रद्धालुएं चा इक जहार 854 श्रद्धालु बालटाल लेई जिसले कि 2 जहार 773 श्रद्धालु पैहलगाम लेई रवाना होए। उत्थुआं फही एह यात्री अपनी अगड़ी जातरा लेई रवाना होइन।

<><><><><><>

LG-Sinha

लेफ्टिनेंट गवर्नर मनोज सिन्हा होरें कल नुनवन ते चंदनवाड़ी आधार शिविरें दा दौरा लाइये श्री अमरनाथ जी दी जारी पवितर जातरा लेई बंदोबस्तें दा जायजा लैता। एल.जी होरें इस मौके पर श्रद्धालुएं कन्नै गल्लबात करियै उंदे शा जाततरा सरबंधी उंदे तजुर्बे बी जाने। आधार शिविरें दे दौरे दरान उनें सेवां प्रदानकरने आलें, डाक्टरें, साफ-सफाई कर्मचारिएं, प्रशासनिक ते सुरक्षा अधिकारिएं कन्नै बी गल्लबात कीती ते श्रद्धालुएं गी उपलब्ध करोआई जा'रदी बक्ख-बक्ख सुविधाएं जियां रौहने-बौहने, लंगर, बिजली-पानी दी सप्लाई, साफ-सफाई, सेहत ते ट्रैफिक सने सुरक्षा बंदोबस्तें दा बी जायजा लैता। उनें सब्बनें सरबंधत मैहकमें ते सेवा प्रदान करने आलें गी निर्देश दिते जे ओह जातरा गी बवस्थित ते सुरक्षित ढंग्गै सिर तोढ़ चाढ़ने लेई सब्बै मुमकन हीलें गी अमल च आहनन।

<><><><><><>

Amarnath-Yatris

अमरनाथें दी जातरा ऐकती रामबन जिले थमां पूरी चाल्ली रमानदारी ते बवस्था आले ढंग्गै लग्गा'रदी ऐ ते जातरा गी ट्रैफिक जाम जनेई कुसै दिक्कत दा सामना हून नेई करना पौंदा। इस्सै दौरान जिला प्रशासन रामबन बी जरूरी सुविधाएं दी दस्तयाबी यकीनी बनांदे होई सब्बनें

सुरक्षा एजेंसिं कन्नै नेडमा तालमेल बनाइए कम्म करा रदा ऐ तां जे श्रद्धालुं गी पूरी चाल्लीं रमानदार ते बवस्थित जातरा दा अनुभव हासल होए ते उनेंगी कुसै बी चाल्ली दी दिक्कत परेशानी दा सामना नेई करना पवै। जिला विकास कमिशनर बसीर उल हक चौधरी होरें उत्थे सेहत सुविधाएं, स्वच्छता, साफ-सफाई, इहरने दी बवस्था जेहड़ी जिला प्रशासन आस्सेआ कीती गेदी ऐ औदे पर आपूं पूरी निगरानी रक्खा करदे न। लंगर लाने आले संगठन बी यात्रिं गी ाफ-सुथरी पौष्टिक ते म्यारी रूट्टी ते खाने-पीने दा होर केई चाल्ली दा समान उपलब्ध करा करदे न जेदे लेई सेवादारें दा बकायदा सिखलाई कार्यक्रम लोआया जंदा ऐ तां जे लंगर पंडालें च सारा कम्म पूरी चाल्ली बवस्था आले ढंग्गै सिर ते लंगर बरताने च कोई दिक्कत पेश नेई आवे। स्हाड़े जिला संवाददाता अजयदीप सिंह नै किश यात्रुं कन्नै गल्ल कीती।

<><><><><><>

Budha-Amarnath

राजौरी दे जिला विकास कमिशनर ओम प्रकाश भगत होरें कल इक बैठक लाइए औंदी श्री बाबा बुड्ढा अमरनाथ जातरागितै त्यारिं दा जायजा लेता जेहड़ी पुंछ जिले दे मंडी लाहके च वाका श्री बुड्ढा अमरनाथ जी दे मंदरै तगर जाने लेई राजौरी जिले थमां बी होइए लंगदी ऐ। डीसी होरें सरबंधित मैहकमें ते सरबंधित होरनें धड़ें गी निर्देश दिता जे जातरा गी पूरी चाल्ली सुरक्षित, रमानदार ते बवस्थित बनाने लेई लोइचदे सब्बै बंदोबस्त पैहले सवां करिए रक्खन। इस जातरा पर मुख् भरै थमां लोक औंदे न जेड़े पुंछ दे मंडी च वाका श्री बुड्ढा अमरनाथ जी दे मंदरै च शिवें दे चट्टानी रूप दे दर्शन करदे न।

<><><><><><>

Accident

किश्तवाड़ जिले च कल पेश आए दे इक दर्दनाक शिड़क हादसे च 4 लोकें दी मौत होई गई जिसले के 2 लोक गंभीर तौर पर जख्मीं बी होई गे। अधिकारिएं मुजब एह हादसा संझा कोई पौने 6 बजे दूर-दरेडे लाहके दच्छन च पेश आया जिसले इक कार शिड़कै थमां रूलकिये हेठ इंहगी खड्डै च जाई पेई। बचा टीम नै हादसे आली थाहरै परां 4 शव बरामद कीते ते गंभीर तौर पर जख्मीं दऊं जनें गी अस्पताल बी पुजाया। तोआई कठुआ जिले च जम्मू-पठानकोट जरनैली शिड़कै पर दयाला चक्क दे नेड़े इक्क बस शिड़कै पर पलटोई जाने करी घट्टोघट्ट 12 लो जख्मीं होई गए।

<><><><><><>

Chief-Secy.

मुख्य सचिव अटल डुल्लू होरें जम्मू-कश्मीर च राष्ट्रीय जरनैली शिड़कें दा बड्डा नेटवर्क स्थापित करने च अजे तगर हासल होई दी प्रगति दा कल तफसीली जायजा लेता। कम्म तोढ़ चाढ़ने आली बक्ख-बक्ख एजेसिएं दे नुमाइंदें कन्नै लाई गेदी बैठक दरान मुख्य सचिव होरें उंदे पर जोर पाया जे ओह अपनी कारकदगी च होर बेहतरी आहन्नन ते एहदे नतीजे जमीनी सतह पर साफ नजरी औने बी लोइचदे न। दिल्ली-अमृतसर-कटड़ा एक्सप्रेस-वे दे बक्ख-बक्ख चरणें बारै उनेंगी दस्सेया गेआ जे इस परियोजना गी बक्ख-बक्ख चरणें च बंडेया गेदा ऐ ते हर इक चरण दा कम्म कन्नोकन्नी पूरे बवस्था आले ढंगै सिर तोढ़ चाढ़ेया जा'रदा ऐ। जम्मू-श्रीनगर राष्ट्रीय शिड़कै दे बकाया रौहंदे चरणें दे बारै च मुख्य सचिव होरें गी दस्सेया गेआ जे सब्बनें

सुरंगें दा कम्म तोढ चाढेया जाऱदा ऐ ते इसी जून 2026 तगर सबूरा करी लैता जाहग। बैठक च चनैनी-सुद्धमहादेव शिड़क, भद्रवाह-चम्बा शिड़क, गोहा खलैनी शिड़क, खलैनी-खन्नाबल शिड़क ते राजौरी-पुंछ जरनैली शिड़क परियोजनाएं पर मुख्त तौर पर चर्चा होई।

<><><><><><>

Udh. Meeting

जिला विकास काउंसल दी तरफा कल संज्ञा उधमपुर च इस काउंसल दे चेयरमैन लाल चंद हुंदी अध्यक्षता च लग्गी दी इक बैठका च जिले च जारी विकास कम्में दी स्थिति, रफ्तार ते प्रगति दा जायजा लैता गेआ। जिला विकास कमिशनर सलोनी राय हुंदे अलावा जिला विकास काउंसल दे मिम्बर ते बक्ख-बक्ख मैहकमे दे अफसर बी एदे च मजूद हे। विकास कम्में दे बक्ख-बक्ख पैहलुएं दे बारै च चर्चा करने दे बाद चेयरमैन लाल चंद होरें आखेआ जे सलामेह पुल दे परतिए निर्माण कम्मै लेई नाबाई तैहत 25 करोड़ रपे दी रकम बक्ख रक्खी गेदी ऐ। उनें दस्सेया जे इस पुलै दे निर्माण लेई प्रस्ताव बनाइए भेजी दिता गेदा ऐ ते इसी इस्सै साल बनाई लैने दी पूरी कोश्ट कीती जाग। उनें आखेआ।

<><><><><><>

Indians-Russian Army

विदेश सचिव विनय क्वात्रा होरें आखेआ ऐ जे रूसी सेना च सहायक कर्मिं दे तौर पर कम्म करा रदे भारतीय नागरिकें दी तौलें रिहाई यकीनी बनाने ते उंदी स्वदेश वापसी दी भारत दी मंग पर रूस सहमत होई गेआ ऐ। क्वात्रा होरें दस्सेआ जे प्रधानमंत्री नरेंद्र मोदी होरें उनें भारतीय नागरिकें गी तौले छोड़े जाने दा मुद्दा मजबूत कन्नै पुट्टेआ ऐ जिनें गी गुमराह करिए

रूसी सेना दी सेवा च शामिल कीता गेआ हा। दस्सेआ जंदा ऐ जे राष्ट्रपति व्लादिमीर पुतिन हुंदे कन्नै होई दी अन औपचारिक गल्लबात दौरान एह मुद्दा पुट्अेआ। विदेश सचिव होरें आखेआ जे दवै पक्ख हुन इस भेठा तेजिया कन्नै कम्म करडन ते भारतीयें गी तौले थवां तौले कियां मुख्य वापस भेजेया जा। क्वात्रा होरें दस्सेया जे भारत मुजब भारतीय रूसी सेना च कम्म करा रदे तकरीबन 35 थवां 50 भारतीयें चा 10 गी पैहलें गै वापस भेजेया जाई चुके दा ऐ।

<><><><><><>